

大

觀

錄

大觀錄明賢名畫卷十九目錄

徐方伯蜀山秋林圖 風竹圖 天香深處圖 一

竿風竹圖

宋仲溫篋簞圖小卷

朱孟辨惠麓秋晴圖

梁用行竹枝圖軸

金本清雙鉤竹石圖卷

姚少師墨君圖卷

王友石江山漁樂圖卷 湖山書屋圖卷 九峯煙

靄圖 墨竹卷

無名氏三株古木圖軸

謝葵丘西莊圖

劉西臺清白軒圖并識 仿梅道人夏雲欲雨圖

杜用嘉月舟圖軸

沈恆吉秋山方霽圖

周東村雲山圖

夏太常湘江風雨竹并題卷

姚雲東江南春雨圖并詩卷

文和州藥圃山房卷

陸包山花谿漁隱圖 立秀樓圖

董文敏畫禪室寫意冊 仿董米法八圖冊 仿惠

崇冊 平岡圖 山水冊 六幘畫冊 葑谿圖

古松圖 楚山清霽圖 荆扉圖 晴嵐蕭寺

圖軸 仿范華原山水軸 詞意圖軸 助喜圖

仿梅道人圖 山水立軸 江上蕭寺圖 鵲

華秋色圖

大觀錄明賢名畫卷十九

吳郡吳升子敏彙輯

徐方伯蜀山秋林圖

方伯名賁字幼文家吳郡望齊門外稱十才子工詩善畫遊淮張睥召徙居吳興之蜀山洪武七年用薦起家歷官河南左布政大軍缺犒勞下獄死詩名北郭集按幼文入朝死獄之歲月牧翁宗伯引據此圖姚呂跋語爲證斥張習之編次舛誤區區繪事有裨史學如此呂名敏字志學洪武初爲無錫教諭云三月廿五日夜風雨中予與呂高士對酌於蜀山書舍行觴之次邀余作畫醉中圖此政自不知醜惡也徐賁是日宿於悟澹齋連榻話舊酒半作此圖明一日南仲雅友意欲得之予豈凝滯於物者耶遂割愛贈之也南

仲字曾改爲伯南云時洪武六年春也志學記

幾疊蜀山雲秋林半夕曛畫中藜杖者相見只疑君
久不見幼文偶於佛慧精舍觀其所畫小圖悵然思之
遂題啓

霜葉覆亭幽相宜最是秋蜀山雖在望無處問青工
甲寅秋九月與江邊叟過佛慧精舍因觀幼文所畫小
圖季迪有詩於上時幼文仕於朝季迪已入鬼錄觀圖
賦詩其悵惘當何如耳題畢不覺出涕焉衍識

雲鎖蜀山秋重來佛慧遊含毫得詩句題入畫中愁
幼文寫此圖余得之轉與伯南高季迪賦詩於上衍師
兄亦有追感之句噫幼文季迪伯南皆物故衍師之北
平國師余獨守職無錫冷署歎所沒者已矣所存者猶
恨離居也追古感今聊識此云時丁卯五月廿二日重

題無礙居士志學

徐幼文風竹圖

白紙本高三尺闊一尺二寸脩篁風偃鳳尾搖蕩妙
得石室坡公三昧劉修撰題書堂餘在本身

欲暝投僧舍風將雨忽來愁腸與詩思都被竹聲催 東
海徐賁畫并題

風雨南禪夜那堪聽竹聲鐙前同酒客但有感懷情
啓與幼文過南禪寺信上人留宿適風雨灑玉竹聲搖
戛深感於懷而幼文寫竹賦詩啟不能無言故特以識
之渤海高啓

人去詩存竹更妍我當吳下想當年春風只在乾坤裏
閒向珠璣掩世賢 宋濂

寫竹題詩贈老禪夜窗聽雨夢金蓮百年留得清風在
三絕令人仰大賢東吳高季迪徐幼文乃國朝洪武
初名臣於未遇時寓僧舍值風雨夜窗寫竹賦詩曲聲
懷抱到今百有餘年而遺墨如新可愛况學士宋公復
爲題志可謂三絕也故書此以見珍重云安城劉宣

徐幼文天香深處圖

紙本高二尺闊一尺峯巒高峻巖宇深沈林樹扶陳
筆法高古絕似大癡一種遜學詩人丁敏也

天香深處篆書 癸丑九月三日蜀山人徐賁畫

叢桂擅幽妍陰陰邃館連種分仙斧後花發羽衣前涼影
敷瑤月秋香絡翠煙栽培今已久高折看君先

余既爲遜學畫天香深處圖後七日復賦此詩蜀山人徐
賁

徐幼文一竿風竹圖

紙本寒林野竹水墨小幅大饒幽致自書詞款絕佳
前後押墨花香處徐賁之印幼文印又收藏諸印



一竿風月一蓑煙雨家傍釣臺西住賣魚生怕近城門况
肯到紅塵深處潮生解纜潮平鼓枻潮落放歌歸去時
人錯認嚴光自是無名漁父調寄鵲橋仙剡郡徐賁

宋仲溫簞簞圖小卷

仲溫名克吳人偉軀幹博涉書傳少任俠擊劍走馬
彈下飛鳥工草隸時賦詩見志洪武初徵爲侍書出
同知鳳翔家南宮里青工作南宮生傳此卷紙本高
七寸長三尺墨竹細勾節剔葉圓阜層折煙梢縈拂
簞簞圖

予舊與野亭君作雞棲石圖後七年復觀於松江之客樓
嗟歲月之易度慨人事之不齊爲之撫圖悽惻野亭君謂
予耿耿者在豪邁之氣非復曩時酒酣出紙徵畫爲寫簞
簞圖筆意縱逸不計工拙然自謂差強於曩作要知水到
渠成顛瀾駭浪自有靜時野亭君當示雲林高士同一賞
識也庚戌九月朔東吳宋克識

宋先生克字仲溫長洲南宮里人書學急就章得古人

之妙尤善畫竹此圖雖寸岡尺塹而千篁萬玉雨疊煙
森蕭然無塵俗之氣尤爲世珍也龍惕子識

朱孟辨惠麓秋晴圖

名芾字孟辨以字行才思飄逸千言立就工於草書篆隸鐵崖門人也洪武初徵授編修改中書舍人此圖白紙本高四尺布景似園亭行筆有生趣圖爲教諭呂君作故詩多詠惠泉也隸書款極精

第二泉頭坐晚晴滿林松籟雜谿聲滌煩老去盧鴻一謝俗歸來衛叔卿未必茶經隨火化擬尋茆屋待春畊臥遊畫裏違清賞裹茗他年石上烹 甲寅秋立冬日雲間朱孟辨爲志學聘君并書詩於建業之青谿一曲

澤國霜晴過鴈天翠微秋色淨無煙歸來好記登臨處
苜蓿盤香第二泉 牛諒

惠山泉石幽深處秋日南宮作畫圖此地何年得同隱
濁醪應可爲君沽 東齋生劉仙客

積翠擁寒雨流泉噴飛雪細讀煮茶經松根待明月
豫章朱夢炎

湖上羣山幻九龍泉頭一客坐雙松定知別後還相憶
夢入秋雲第幾重 鄉人張籌

北遊曾飲惠山泉客裏披圖思惘然尙憶信安祠外柳
蕭條猶帶汴隄煙 海門瞿莊

碧樹陰分雲外出清泉影落石閒流山人獨坐西風裏
正值南天過雨秋 臨川吳伯宗

梁用行竹枝圖軸

公名時字用行長洲人讀書會稽山洪武中以善書
選授岷府紀善遷翰林典籍革除後修永樂大典充
副總裁此圖白紙本寫嫩梢叢葉弄雨含煙之態大
有元人氣韻詩跋書法精能三絕妙跡也

山館曾移玉數竿色常蒼翠影團圓別來見說丰姿在不
減當年舊歲寒

余與永言佳友別經五六寒暑矣懷仰之勤形諸夢想詩
云有斐君子終不可諼今予與永言亦云故寫竹梢并詩
以寓契闊之意焉永樂六年夏五端陽前四日安定梁用
行書於玉堂之西序

金本清雙鉤竹石圖卷

公名湜字本清號朽本居士四明人任中書舍人累遷至太僕卿工書法善寫竹石鉤勒竹尤妙紙本

看過長安陌上花題詩偏憶舊生涯門前一曲南湖水多種琅玕護釣槎朽木居士

姚少師墨君圖卷

公名道衍字斯道長洲人幼名天禧本醫家子至正
間削髮相城之妙智菴從道士席應真學通兵家言
洪武中十王之國命各選一高僧時公在燕府籍中
靖難兵起贊助祕密成祖卽位賜名廣孝永樂六年
逝年八十四封榮國公謚恭靖加少師賜塋在房山
縣東北四十里此卷牙色紙本高九寸長三尺餘筆
致似黃華老人而古拙過之公書法婉媚多見題跋
若繪事僅此耳後紙緇白雜題皆琅玕清韻也

永樂六年夏五月余因病不出獨坐於壽椿堂之南窗忽
想長洲舊業之竹歸心油然而生也故作短梢并詩以紀
其事云翠葉穠穠拂水雲淩霜勁節不同羣荒村寥落無
人處誰謂茆庵有此君初八日午前書姚廣孝

北地風高卷塞雲亂沙吹起鴈成羣客邊偶寫龍孫譜
忘却江南有此君 長洲戴冠次少師韻

玉帶曾聞侍五雲空門今日有誰羣閒過方丈觀遺墨
瀟灑清風似見君 正德辛未季春上巳日長洲沈源
壽椿堂上玉帶翁忽思故園寫秋風枝枝葉葉妙筆法
湖州文老將無同故園平安有誰報風吹不到長安道
何如手把珊瑚枝歸去江南弄釣絲 沈周

誰寫江南一片雲清風瀟灑不隨羣少師自得空川趣
獨憶虛君拂節君 長洲沈杰次原韻

貌取湘簾入畫圖醉中拈筆墨模黏斑斑寫到關心處
曾有湘妃此淚無 邑人吳一鵬

何處移來半畝雲秋風蕭瑟數離羣僧家空學元無竹
偶向禪牀寫此君 沈濤

百尺喬枝上拂雲東風草木豈同羣我公會截簫韶管
奏向虞廷荅聖君 郡人顧福

維摩示疾隱蒲團閒寫江南翡翠竿想歎故樓歸未得
朔風吹雪滿長安 唐寅

琅玕挺挺拂荒雲林下秋風伴鶴羣鳳輦不知何處去
九疑空望泣湘君 天童懷讓

清午坐深館荒涼憶故廬故廬不可即寒梢竟何如拈
毫寄幽想恍然見扶疎淋漓一枝裏思溢千晦餘誰能
把清玩十襲真璠璣對此後百年風情儼其初斯人起
遺慕夢寐與躊躇楚煙雜湘雨題詩正愁予義興杭濟
玉堂學士東坡翁瀟灑墨竹生秋風海內流傳至今惜
異世少師無乃同少師之身本法報法身法報僧家說
也局促強置青雲道寄心漫作荒山枝高堂煙雨吹如

絲 杭淮和石田韻

淇園稚子已成翁
條然落紙生清風
百歲山門留玉樹
墨痕猶與當年同
平安浪說無人報
而今野外猶能道
莫遣吳儂歌竹枝
愁邊雙鬢易垂絲
漕湖錢貢
有竹無由返故園
午窗墨瀋灑香痕
釣竿漫有滄浪興
恐負天邊雨露恩
沐陽伊乘

煙雨瀟湘隔水雲
眼中清趣更無羣
少師本是虛心者
獨對清風寫此君
永新胡錦輅

維摩真性在清寒
寫出瀟湘碧玉竿
欲返故園歸未得
秋風先報客平安
古吳張珍

我朝少師圓頂翁
鳳皇池上寫清風
油然歸思生筆底
彷彿似與江南同
一枝寄贈不望報
至今流落姑蘇道
我來借看摹一枝
禪榻茶煙在鬢絲
姚哲

王友石江山漁樂圖卷

舍人名穀字孟端無錫人洪武戊午徵入官以事累
謫戍朔州永樂初以善書薦授中書舍人十二年卒
襟度蕭爽工於繪事游覽之頃遇長廊素壁索酒引
滿揮灑淋漓有投金帛購片楮者拂衣而起其高介
如此此卷白紙本高八寸長一丈六尺筆法雖仿梅
花道人而芟盡陳趣發揮新意能自成家舍人無款
止有印得石田郭庵二公題識遂令頗上三毫全現
卷首藏紙箋文三橋篆書具釵頭鼎足之妙

江山漁樂 文彭書

嘗閱孟端所作或竹石小幅或古木新梢清簡踈曠筆
意幽然人自有不可造及之處偶過東樓書院乞余點
全黃鶴山樵畫卷殘缺筆墨之餘復出此卷鑒賞之下

令人氣清神爽與平日所見者霄壤懸絕繁中置簡靜
裏生奇山水湊聚樹石縱橫自始至末屢閱屢勝且邨
落頓放情致交錯氣脈貫通若長江一瀉婉拙手必不
能造及端翁平生得意之妙點染之精無出於是可與
輞川同歸藻翰東樓以余言爲是請識卷尾以爲他日
觀者之證也沈周

予喜孟端圖畫所蓄多幅自以爲勝適聞石田鑒賞東
樓所得此卷借閱一過若玉石不同真珍品也物之美
惡真僞可不辨哉故識之吳寬

王孟端湖山書屋圖卷

白紙本高九寸長一丈八尺六接雲峯昨嶠煙瀕空
明樵塢煙汀耕農接畛翳然林木書屋清幽點筆俱
成真境但皴染上下一色未能淘洗脫化耳蓋舍人
畫多位置帖妥類作家習氣緣明初洪永之際雲林
黃鶴相繼淪沒藻繪之道或幾乎熄不得以壇坫
歸之顧求其標新領異迥出天機則吾未之見也第
世傳竹石小幅甚夥似此長卷磅礴又屬僅觀者耳
引首徐髯仙篆友石游戲四字拖尾文俞二跋並佳
仲鏞與僕有夙昔之好嘗命僕作湖山書屋圖久羈塵鞅
未副其意茲復以佳紙見遺迺促成之因寫是圖以歸焉
吁佳紙佳畫斯爲稱矣顧僕拙筆安敢以此紙相耀光哉
然仲鏞知我者也必不以是爲誚并書此以紀其歲月云

時永樂庚寅仲秋望日毗陵王孟端識

友石先生畫品在能之上評者謂作家士氣皆備然其人品特高能不爲藝事所役雖片楮尺縑苟非其人不可得也此湖山書舍圖聯六紙而成修三十尺耕漁出沒邨舍近遠煙雲變滅種種臻妙非累月構思不可成豈獨今之所少哉子和藏此真希代之珍也正德丙子三月旣望衡山文徵明題

友石此圖文公嘗爲第次其品今觀其巖巒窈窕岵岵紛披參差出沒於蒼煙白浪之中以至谿橋林屋疏峯抗館農田漁艇畷父村樵幽蹤往復恍若別在世外真可謂深詣湖山之致者矣讀書於此必能絕冥離類殊使人遙想而存之談太常思重性好博雅相示此圖輒遂題其後云隆慶二年夏六月十有八日俞允文記

王孟端九峯煙靄圖

白紙本高八寸五分長九尺餘設淺色做一峯老人
參以梅沙彌法筆意縱放神品也

甲申秋日王紱寫

畫竹休將竹史看王猷家自有江山空庭莫訝千尋影
萬里煙波只尺間

高下青山遠近村清江處處繞柴門鑑湖一曲消多少
須問君王再乞恩志同少宰得九龍山人山水長卷
留予家數月不欲空返爲題四篆字意猶未已復以二
絕終之正德四年秋八月戊寅西涯李東陽賓之識
細把平生履歷看直從湘水到吳山風帆雨屐知無數
都在王郎尺素閒

長林疎影照江村茆屋蕭蕭自掩門莫笑白頭無舊業

太平何地不君恩 次韻二首後一首予正德丙寅在
陝西夢中得前二句明年丁卯謝病歸江南續成之涯
翁是詩韻偶相類不復別作豈吾人同志真有所謂神
交者耶石淙楊一清

人品還從畫裏看舊家元識九龍山他年曾著江行記
忽漫相看尺素間

處處清江曲抱邨白雲碧石幾柴門九峯指點青如許
偏得天家雨露恩 常郡邵寶奉次

王孟端墨竹卷

紙本高八寸長二丈四尺十接引首陸儼山題孟端
自書長跋頗自標許前後押友石生長印孟端印璫
臺雪鶴印九龍山中道士等印翼雲生馮鼎迄董文
敏諸家詩跋墨采奕奕照耀贖尾可寶祕也

萬竹秋深陸深題

僕厭倦作畫久矣一日俞君行□攜此卷適予徵墨君時
小酌微醉卽欣然一揮不覺紙盡其韻度雖不能盡合古
人繩墨然一種林野散逸之氣出自家意思者似亦可取
俞君天趣甚高鑒賞之餘其必舍形似而得於驪黃牝牡
之外矣永樂庚寅仲夏望前三日九龍山中人王孟端識
寫竹之法何人起乃自唐時吳道子窗閒寫影李夫人
筆意源流無出此世稱絕品文湖州清風萬古誰同流

眉山學士能知識八法縱橫氣味投數公之下鳴者少
 吳興松雪獨通曉丹丘博士老入神後世相承光皎皎
 九龍山人王中書當時寫竹多名譽醉來爲作谿園趣
 一掃千竿興有餘枝枝瀟灑凌雲氣轉側低昂出新意
 長汀斷浦草離離怪石巔崖真奇異淋漓千畝雲煙溼
 晝雨霏霏風飄飄寒光閃爍虬龍升翠色婆娑鸞鳳集
 時時只見春滿林歲寒那得雪霜侵瀟湘渭水同爲俗
 都是悠悠君子心 翼雲生

中書醉灑墨寫竹意無窮妙趣誰能識貞心自不同
 娟凝翠靄蕭颯響清風幾度瞻淇澳悠悠興轉濃 丹
 陽張衡

馮外史有詩題墨君因次其韻

丹霞曉雜文光起尋訪立都馮仲子瓊室翠館不易到

俗緣脫盡來過此此中宛似小瀛洲
颯颯松風天際流呼童洗鼎瀹新茗
促席忘言清味投品題重見王逸少
文章翰墨兼通曉醉揮古墨成琅玕
淇澳風清湘月皎縱橫枝幹備法書
未讓老可專名譽渭川千畝目不盡
嶰谷萬箇春無餘汀葭沙艸含霧氣
懸崖竇石殊適意長波浩蕩渺天涯
縛龍吐蟄尤驚異兩飛數點蒼苔溼
鳳皇欲下祥風飄俞君得此足祕玩
騷人墨客時交集今歸將門橫劍林
高標勁節無塵侵凌霜傲雪色不改
共期歲晏堅貞心金華周旼

淇園春曉春風暖翡翠初鳴晴光滿
琅玕箇箇拂雲長秀色娟娟露新浣
繁陰蔽地莓苔深荒荆叢棘無相侵
春雷一夜忽霹靂犢角突迸何森森
九龍山人金閨彥簪筆晚下金鸞殿
興來寫此綠玉圖葉葉梢梢誠堪羨

我嘗見寫多瀟灑今見斯圖尤異者雲氣冥濛虬忽升
月影徘徊鳳欲下青原之陽有草居別來久住東華隅
居前萬竿亦如此卷圖還客生長吁 廬陵傅岫

我本山野人素抱煙霞疾何處慣經行松篁與泉石晴
窗偶看琅玕圖淋漓醉墨傾金壺崇岡怪石相高下冷
雨疎煙半有無數竿渭川晴日暖春風輕數竿嶰谷老
千年霜雪飽數竿楚江軟歲晚寒風吹數竿淇澳側秋
深雨蕭瑟千竿萬竿難盡名林巒仿佛清風生交枝直
幹平安態勁節虚心君子情對此怡然樂清賞撫卷無
言發遐想煙雨濛濛語鸕鶿詩懷常在湘江上 東軒
中書逸興寫琅玕墨蘸金壺溼未乾漠漠縈紆森綠玉
亭亭綽約下青鸞高風貞士心猶勁薄暮佳人袖欲寒
從此卷舒清眼底不須鄰舍扣門看 沈真

坡翁論畫竹獨推文湖州與可謂有成竹具於胸中此
可謂得其勢矣而未及於神國朝畫竹王中祕爲開山
手此卷予得之立池家先賢題跋甚多一展卷而含煙
噴霧拔石迸天颯颯然真不翅蛟龍起而風雲集也畫
皮畫骨難畫神坡翁亦必以余言爲知言矣 董其昌

無名氏三株古木圖軸

紙本高三尺六寸闊一尺六寸無款印二方有王汝
玉偶武孟二詩題於上汝玉名璩以字行長洲人洪
武間歷仕至春坊贊善與解大紳齊名武孟名桓太
倉人家於桃源仕終荊門州吏目

高岡鬱嵯峨上有千歲木枝幹盤虬龍膚理結蒼玉公
輸不爲用偃蹇老巖谷南山有長松采之登夏屋抱材
世爲累世事恆倚伏所以斥鷃徒翻思詭黃鵠青城山
人王汝玉

落落巖廊具空山獨爾憐曾沾唐雨露特秀楚山川黛
色煙霞古貞姿鐵石堅菲菲慚小草競欲借春妍年深
楚 海濱遺老偶武孟

謝葵丘西莊圖

先生名晉字孔昭號葵丘吳人能詩畫山水爛熳重疊嘗自戲爲謝疊山吳文定題其臨大癡卷云謠語空傳謝疊山是已詩名蘭亭集此圖白宣紙本高四尺餘闊一尺五寸板橋跨澗兩旁護以低闌山麓築草堂中設几榻一人幅巾立階下童子持杖隨後一磬折揖而入堂前雙松離立點葉夾葉樹參差蔭覆屋後丘壑重疊飛瀑垂注山窪結茆亭上高山如障蓋澹墨皴濃點苔行筆雖蒼老乏出神入化洞心駭目處第圖爲石田翁大父作時翁方在娠後五十四年翁爲題詩復索短跋遂成佳蹟故錄之按葵丘前後畫史幾及百家其筆墨大抵皆作氣卑之無甚高妙概置弗登所謂自鄒以下無譏耳

不到西莊僅五年衡門喬木愈森然憐君丰采情如舊愧我龍鍾雪滿顛西莊迺孟淵徵士所居風致清幽復出塵外余不至久矣今次復過孟淵款留二三宿情好如昔將別留圖賦詩以歸之時宣德丁未仲春三日葵丘謝晉識

葵丘謝先生以詩畫名家一時相與者無不得其所作沈氏所藏殆不止此啓南以此作於其未生之前故特題詩以著其感慨之意其子惟時請余綴其上予自弱冠以契家子每侍先生杖屨今其去世已四十餘歲其光儀聲教宛在於耳目然先生之遺墨在於余家不忍展玩蓋以先生屬纊之日正先府君見背之年其所感又有甚於所南者惟時之請不容終拒哽咽拭淚因書以填空紙後學陳頤拜書

先公舊得葵丘筆澹墨真成北苑風未歲春時圖旣作
丁年冬仲我初降後生已見衰毛白往事空驚轉燭紅
今對青山弔雙鶴秋風吹淚到遼東 此卷作於宣德
二年二月三日周尙未生生於其年十一月二十一日
距作圖時尙十越月周今年五十有四髮已種種葵丘
旣化去先公已違養十有八年撫圖之際感念今昔不
知雪涕之沾襟也因詩以識之成化庚子花朝日沈周
拭淚書

劉西臺清白軒圖并識

公名珏字廷美長洲人宣德中中應天鄉舉官至山西按察司僉事退休林下年甫五十操履清白老而好學工詩人稱劉八句行草師北海畫法梅道人得其神韻精於鑒古訪求甚富吳文定序其詩曰完養集此圖紙本高三尺闊一尺餘山水樹石在子久仲主間秀潤古雅中作水閣一人與僧對坐旁一人憑闌俯視閣之東又一室壁懸古像脩然絕塵完養自題絕句并系跋其左題右詠曰沈孟淵者卽徵士璽菴石田翁之祖也曰恆吉者卽同齋先生石田翁之父也尺幅中沈氏三世翰墨在焉豈非珍圖祕寶水閣焚香對遠公萬緣都向酒邊空清谿日暮遙相望一片閒雲碧樹東 戊寅孟夏朔日西田上人持酒肴過余

清白軒中相與燕樂悅若致身埃壚之外酒闌上人乞詩
畫爲別遂援筆成此以歸之先得詩者坐客薛君時用也
彭城劉珏識

十里東風吹暮春方袍來賀錦袍新閒花盡笑忘形醉
誰道山僧是故人八十三翁沈孟淵

一片閒雲出岫來袈裟不染世間埃獨憐陶令門前柳
青眼偏逢惠遠開馮旂

十載天涯作宦遊黃塵飛滿紫貂裘歸來不數長途險
猶寫關山萬里秋吳興沈恆吉

理罷金經暫出遊片雲孤鶴思悠悠浮杯直到南谿上
贏得文房下榻留河東薛英

舊遊詩酒少劉公人已寥寥閣已空仙鶴倘來還感慨
祇應此地是遼東完菴詩畫物故久矣沈周後戊寅

十七年歲在甲午用韻題於觀感閣

劉完菴仿梅道人夏雲欲雨圖

絹本高五尺六寸闊二尺七寸仿梅道人夏雲欲雨
圖意而骨墨直接巨師法派殆所謂囊括古人不爲
意象所縛者歟完菴畫傳世絕少此尤精詣無款押
印在左方石田翁長歌并跋書圖之後

完菴再世梅花菴官廉特於山水貪記揭此圖梅妙品
奉常寶蓄金惟南假歸洞庭小石室終日默對心如愁
心開手應遂挺筆水墨用事空青藍天光慘澹雲鬱勃
山影明滅雨意含重巒杳巖擁溼潤遠樹細瑣多杉枏
飛淙迸壑勢莫拗梁圯跨怒森猶監人家雜住映深塢
林蹊互接迷陰嵐梅菴如在當歎息逼人咄咄夫何慚
有如明月印秋水水月渾合光相函此圖傳世人可保
不特珍重宜子男我因題句感宿昔物是人非懷莫堪

右原本爲夏雲欲雨圖實出梅花道人之筆□蓄夏太
常所劉完菴僉憲假臨幾月始就緒當時示予爲之數
賞奪真僉憲公亦自珍愛僉憲旣觀化其孫傳知先公
所惜益加敬焉因索予疏其所自云弘治乙丑三月修
楔日沈周題

杜用嘉月舟圖軸

公名瓊字用嘉吳縣人博綜古今爲詩文和平醇實
尤善寫層巒疊嶂師法吳仲圭秀潤可觀性至孝每
求賢詔下輒首舉固辭不出學者稱東原先生卒年
七十九三吳會葬者數千人私謚曰淵孝云

倣荆關體成化四年仲冬十一月鹿冠道士杜瓊寫
月舟上人見疑舫居士於松陵之穆谿戊子秋暮又見
於吳城中居士以其能詩樂與之見出東原先生月舟
圖於袖有不樂與之詩而略以緇流乎

新住法雲院阿師明月舟去來原不繫身世總成浮印
徹千江水觀空萬頃秋相逢問有漏資斧待誰修
行舟江上月觀我鏡中天皓魄初圓後微波欲定前倦
游收釣具吟穩得詩禪曾到珠涇否三生舊有緣

此夜聞乘月風長漫引舟有僧如惠遠何樹是閻浮飛
鏡三千界推篷五月秋扣舷能見許予亦事清脩 嘉
禾周伯器名鼎

出定何招礙舟行月在天交游千里外尊酒十年前白
社誰非客曹谿卽是禪搖搖無住著從此謝塵緣
泊胥門月舟上人以圖索和和中無舟子解事語擊空
明泝流光在上人自爲之壬辰三月綬志

一棹清江近塵途更不由煙光分遠渚秋色自中流偶
作有爲偈非關無酒謳歸來有別箇猶自未迴頭

東原先生贈月舟上人詩畫清絕一時山陰余玠見之
遂和

沈恆吉秋山方霽圖

先生名恆吉號同齋石田翁之父也所居窗明几淨
器物古雅風日晴美與其兄南齋佩古冠服登樓眺
望或時扁舟入城留止僧舍焚香瀹茗精繪事妙處
直逼宋人然自重不苟作必經旬越歲乃出卒年六
十九吳文定爲表其隆池阡云此卷紙本高二尺六
寸闊一尺二寸鳳毛麟角未易觀止者也

此老癯疎一釣徒服也非儒狀也非儒年來只爲酒糊塗
朝也村酤暮也村酤胸中文墨半些無名也何圖利也
何圖煙波染就白髭鬚出也江湖處也江湖調一翦梅時
雨方霽臥寐此窗展玩古法名筆爲作此贈誠蒼老友一
笑沈恆吉

周東村雲山圖

東村名臣字舜臣吳人能詩山水人物俱有清致仇實父所從學畫者也此圖紙本高三尺餘巖崖飛瀑黃葉繞門谿友乍來村童掃逕雲山秋景悠然滿楮純用焦墨尤得南宋雄壯之氣款書左角都少卿題絕句於上少卿名穆字元敬弘治己未進士歷主客郎中年五十四乞休加太僕少卿致仕又十四年卒爲郎時奉使秦中搜訪金石作金薤琳琅錄歸老之曰齋居蕭然日事讎討或至乏食晏如也

東村周臣爲叔賓顏尊兄寫意

滿目雲山秋不礙草橋流水曲通邨兩翁清話林堂靜俗客何由得到門都穆

夏太常湘江風雨竹并題卷

公名景字仲昭崑山人永樂乙未進士起家中書舍人累進太常寺卿直內閣詩文書法皆妙尤工竹石陳永之云王舍人夏太常二人寫竹著名一代然孟端於魏遺一無所受而仲昭則四方請乞無所不應識者不甚予仲昭余爲衷其說曰舍人之介太常之通不妨兩是也此卷紙本高一尺四寸長三丈三尺煙梢雨葉曲盡竹趣太常長題書既工詣而倪文僊跋多至六百餘字官爵全系並可玩也

錢塘戴君文進博雅之士也嘗寫山水與余有舊好持紙一卷求寫湘江風雨奈予人事紛擾久未能復一日小酌之後頗有餘興遂作此圖殊覺粗俗可媿觀者幸勿謂予之狂而恕其醉也般門弄斧之議其能免乎正統元年夏

六月望後東吳夏景識

湘江風雨竹一卷乃太常少卿東吳夏公仲昭所作者也
以贈錢塘畫史戴君文進學士張先生士謙嘗爲序之
文進復以與同邑高隱瞿君德宣德宣復屬予題其後
蓋仲昭永樂乙未進士素工書被選在綸閣太宗皇帝
甚重其書以餘力師中書錫山王君孟端寫竹盡得其
妙孟端沒仲昭之竹遂獨步當世四方之人得其一筆
莫不寶愛之仲昭作是時爲吏部考工主事正其中
年得意筆也說者謂書與畫一法耳工書者必工畫其
信然哉予觀其平昔所作或直幅或橫披不過三五竿
而止耳未見有至若干尺多至數百竿若是卷之富者
也誠以文進一代良畫史也山水人物翎毛花卉無不
臻妙是以仲昭曲盡其能以示之以文進爲具眼也文

進見之能不撫卷而愛羨之乎使其未造精妙文進名
手顧肯求之予以是知是卷之不易得也且竹之爲態
得水則格益幽清得風雨則姿益活潤况湘江乃多竹
之地仲昭抽毫運思狀其景於目前驚灘鷗渚縈迴曲
折清流激湍潺湲溶漾而叢篁密篠掩映於兩岸之間
微風搖動疎雨淋漓其幽清活潤蓋有無窮之趣焉一
開卷閒真若接蒼梧暝煙而駐重華之霓旌也真若弄
瀟湘水雲而鼓江妃之瑤瑟也真若翠羽琤琕而鳳來
巢也真若長身交亞而龍欲化也真若風淒雨霏枝翹
節勁山長水遠而望不極也竹之妙信無以加於此者
矣昔白樂天作畫竹歌贈蕭協律有云蕭郎蕭郎老可
惜手戰眼昏頭雪色自言便是絕筆時從今此竹尤難
得今仲昭年已八十餘雖欲復爲此必若蕭郎之不能

矣則斯卷也得不得爲世寶哉德宣博雅好古君子也文
進持所愛爲之贈其重德宣亦至矣予故道其爲難得
俾益知珍襲焉成化四年戊子歲秋七月旣望賜進士
及第禮部侍郎致仕前翰林學士左春坊大學士侍文
華殿講讀直東閣兼脩國史同邑倪謙書於靜存軒

姚雲東江南春雨圖并詩卷

公名綬字公綬嘉善人天順末進士拜御史出知永
寧解官歸善畫得古法作滄江虹月之舟彈絲吹竹
游泛吳越閒家設亭館作室曰丹丘自號丹丘先生
又號雲東逸史云此卷紙本高九寸長四尺水墨畫
叢林幽亭疎林遠岫氣韻鮮潤欲溼逸品也緋印前
後十六方雲東自題詩若跋連書尾紙允稱三絕

江南春雨圖 逸史畫

弘治壬子初春之夕與世姻錢壺隱飲玄同軒談笑破風
雨預飲者壺隱同里福源羽人沈碧淵陳生天常其姪山
子西鄰趙生文佩予仲子旦凡七人時夜未央興各豪甚
僉曰醉亦不辭庶無負千金之刻於是且奕且飲如監史
戒之曰主勝則飲客客勝則得詩壺隱曰金谷之罰先生

其得辭耶予雖醉而奮爲之趣亦不少李白所謂但得醉中趣勿爲醒者傳其斯之謂歟雲東逸史識

癡雲暗四野急雨捎四簷且飲且弈棋二者何以兼因之較勝負於酒不復嫌杯到君莫辭請以君手拈盤中有何物一味水晶鹽歡然至深夜燭影晃湘簾

寒不知春尙擁鑪新藟爲客笑相呼竟忘青草池塘雨夜半敲棋似昨無

誰家笑語破春愁風雨殊難秉燭游試問梅花君到否人閒唯我有丹丘

翌日子旬聞予留壺隱於丹丘自雲西攜酒來雲東之世恩堂酒酣壺隱索書前作余乘興書小引當此酣餘未免行閒欠正又次日對雨書三詩請題大字遂以春興命之乃復爲春興詩綴尾焉逸史

詩思如泉湧還愁墨未濃書今春富貴已不似窮冬一

別幾兩月千山隔萬重君來剡谿棹予老左巖松燭爲芙蓉
酸書緣豆蔻封片雲因雨黑應不爲詩濃

春來興不淺酒半獨哦詩共惜歡娛處都忘去住時暖將
催柳眼寒尙勒花枝此卷長留在非君更屬誰

老去風情少春來雨意多若教新醉減其奈舊愁何遠嶠
還青黛長谿已綠波雲消星歷歷猶自學吳歌

芳草青猶短紅螺飲尙長酒深濃易醉梅落細留香客路
雲雙棹人情紙半張同儕亦兄弟風雨共西堂

秋興見老杜詩春興之作昉於予乎廿九日壺隱將別去
且曰春尙有仲與季紙尙有空俟重扣雲東乃請紹續其
音予因重記之耳逸史時年七十又一

文和州藥圃山房卷

和州名嘉字休承待詔仲子也官和州學正以畫名
蕭然簡遠偶得意處或過其父與兄壽承皆明經修
行清真拔俗真瓊枝玉樹王謝家子弟也此卷白紙
本高八寸長三尺二寸有詩跋十一家未錄

嘉靖庚子十月十九周公瑕過余齋中適久晴得微雨且
昨辱蔡叔品邀爲藥圃山房之會遂與壽承諸君子朗冒
雨同往比至雨霽月出於是錢子叔寶彭子孔嘉偕沈禹
文亦至諸公高興逸發見几上素卷嘉與叔寶子朗合作
橫軸孔嘉忽吟二句畫史爭圖藥圃花山人倒寫巖閒樹
八人欲爲之聯句不成因各韻賦詩是日胡紹之期不至
石民望已先在坐補水仙石在旁陸紫芝將爲之記因書
此先馳云休承識

陸包山花谿漁隱圖

先生名治字叔平吳人少年游俠長而束修自好工
寫生山水仿荆關而時出己意爲王弇州臨華山圖
四十幅奇峭削成又畫洞庭十六景弇州稱其上逼
李郭馬夏而下勿論也先生畫請之而強必不可得
不請乃或可得年八十餘卒崇祀誓宗此圖白紙本
高三尺六寸闊九寸純仿叔明得其神韻

隆慶戊辰陸治作花谿漁隱

陸叔平立秀樓圖

白絹本長三尺闊一尺餘畫得園林景架妙有逸趣
小款真書左角重題在圖之端

嘉靖癸巳仲春包山陸治在立秀樓寫意

少陵曾把并州翦翦取吳淞一片秋我欲攬波三萬頃與
君同作洞庭遊 包山陸治重題乃萬曆乙亥孟冬也

董文敏畫禪室寫意冊

宣紙八葉筆墨簡澹丰神蕭逸首二幀六幀八幀文敏俱綴跋語餘止書玄宰二字後奉常太守互相題拂兩王公爲藝林宗匠故能深入畫諦加以此冊書爲石谷先生所藏識珠人自當袖有驪珠耳

己巳春自西湖歸寫湖一曲玄宰

林杪不可分水步遙雖辨一片山翠邊微茫見村遠玄宰每觀古畫便爾拈筆興之所至無論肖似與否欲使工者嗤其拙具眼者賞其真書畫同其一局耳其昌己巳中秋峯嵐渾厚草木華溼以畫法論大癡非癡豈精進頭陀而以釋巨然爲師者耶玄宰

壬子嘉平石谷過訪此冊出自行笥觀於拙修堂余向日所藏思翁真蹟頗多而筆墨氣韻無如此冊爲最識

者宜寶之王時敏

以澹見真以簡入妙神理意趣溢於筆端今海內所以
折服文敏者蓋前無古人後無傑作者莫與之原也麟
鳳之子不離飛走文敏殆游龍乎王鑑題

董元宰仿董米法八圖冊

麗箋本計八幀每幀文敏對景題五言斷句各一首
有聲畫無聲詩覽之使人癡癡渙釋心目開張文敏
自識謂用元章父子兼北苑大年法由其天姿穎絕
古人程度一觸便通故雖小品能驅遣毫端融化也

玄宰畫

檀欒映空曲青翠漾漣漪暗入商山路樵人不可知其昌
煙江疊嶂玄宰

輕舟南垞去北垞森難卽隔浦望人家遙遙不相識其昌
玄宰畫雨中山

颯颯秋雨中淺淺石榴瀉跳波自相滅白鷺復驚下其昌
玄宰畫

北垞湖水似雜樹暎朱闌逶迤南川水明滅青林端其昌

立宰畫

秋水歛餘照飛鳥逐前伍彩翠時分明夕嵐無處所其昌

立宰

吹簫臨極浦日暮送夫君湖上一回首青山卷白雲其昌

立宰畫

輕輶迎仙客悠悠湖上來當軒對尊酒四面芙蓉開其昌

立宰寫洞庭秋霽

追涼泖湖塔院寫夏雲奇峯八冊大都用米元章父子法而兼吾家北苑與趙大年筆意今世多僞爲余畫者以此稱董可也董其昌題

董香光仿惠崇冊

麗箋紙高一尺一寸闊八寸共八幀每幀文數俱有
對題頗沾沾自喜得傳惠師衣鉢按畫始於癸丑甲
寅秋題於壬戌之春相距蓋十年所真能事不相受
促進自造神妙地位也

憶在癸丑甲寅秋余至京口送別武陵楊侍御居張氏園
中適黃中舍賓王攜惠崇卷易余黃鶴山樵青弁圖題跋
數日乃返之余分爲八景略得惠法今又有十餘年矣射
陽湖重覽於敬韜公署壬戌二月其昌

敬韜兄畫山水士氣作家俱備翩翩突過吳興前矣猶復
好余畫不置昔子昂與鮮于伯機善每伯機書一紙則自
書三紙易之此乃假之羽翅有謂子昂欲損其真論恐壓
吾名子昂何有於伯機哉吾想敬韜不復疑也董其昌題

玄宰寫惠崇筆意

此惠崇學畢宏所謂卷雲皴者趙大年專師之玄宰題

癸丑甲寅九月畫壬戌二月題於水部官廳玄宰

惠崇巨然皆僧中之畫禪也惠崇如神秀巨然如惠能南
能北秀二宗各有意趣壬戌二月重觀甲寅臨本題

癸丑甲寅九月畫壬戌二月題玄宰

惠崇江南春卷不甚皴擦似水墨青綠一筆染成他人爲
之便無骨力此僧中龍象亦詩家右丞畫與李昭道父子
傳衣鉢者壬戌二月題玄宰

癸丑中秋舟泊南徐新安黃中舍以惠崇春江圖見示余
亦攜王叔明青弁圖乃山樵絕筆中翰瞠目叫好因共易
一觀余爲臨分作七幀未就適朱敬韜亦至奪予所臨今
年又補一幀已失真卷遂不復能似矣乙卯立秋日董其

昌識

董香光平岡圖

絹本高三尺闊一尺三寸純仿荆關得其雄厚之氣
筆墨高古諸品中當推傑作

風軒水檻壓春流一帶平岡草木稠心喜應門差解事只
容漁父謾相求董玄宰畫并題

董元宰山水冊

鏡面麗箋紋細而白修廣八寸計八幅仿宋元諸名家筆墨有靜氣迎人之妙題跋書法極精奕可玩

辛未中秋寫思翁

思翁仿巨然筆

玄宰

仿山樵思翁

玄宰

思翁筆

玄宰

仿梅道人筆壬申六月付第七孫虞收藏

董元宰六幘畫冊

白麗箋計六幘每幘或蕭疎平澹天真爛漫或仿北苑沈厚雄渾或煙雲繚繞樹帶暝色或垂柳鷗沙釣竿橫艇尺幅閒理趣咸生丘壑兼到奏紙草書對題詩詞尤聯珠也江村宗伯著三跋未錄

玄宰仿黃鶴山樵

據梧策杖事紛紜樓上看山對晚曛縱是樓頭山色遠只如小米畫煙雲玄宰

癸亥十月玄宰

買陂塘旋栽楊柳依稀淮岸湘浦東皋雨過新漲綠看沙觜鷺來鷗聚玄宰

玄宰華山莊畫

雨過長江浪拍城迢迢孤棹水中行舟人指點雲生處喜

見青山一抹橫玄宰題

玄宰畫太白詞

平林澹澹煙如織寒山一帶傷心碧暝色入高樓玄宰
玄宰

黃蘆岸白蘋渡口綠楊隄紅蓼灘頭雖無刎頸交頗有忘
機友點秋江白鷺沙鷗傲人間萬戶侯我是不識字煙波
釣叟元詞癸亥十月山莊紀興共得六景玄宰識

平生交游間吾幘亦屢岸區區稻梁謀君亦逐鴻鴈玄宰
董文敏嘗云作畫妙在斷而不斷續而不續正與陳白
沙先生論畫放而不放留而不留有合有合此是深造
語今觀文敏畫冊洵然得其意者六幘不爲少也癸丑
春正月楫題

思翁書畫流傳海內者何啻充棟而贗鼎紛紜魚目相

溷卽我郡賞鑒之家購藏真蹟亦未易多見也此冊爲
陳子九割愛贈予北行者今留付敬兒珍守勿失并爲
芸窗游藝之一助云癸丑上元後八日克齋力疾書

董香光葑谿圖

壬寅首春董玄宰寫時因顧侍御自構李阻雨葑谿檢古人名蹟興至輒爲此圖

此北苑兼右丞玄宰開歲便弄筆墨此壬寅第一功課也歎羨歎羨繼儒

董香光古松圖

白楚紙本高三尺餘闊一尺五寸款書大字三行遠山點小樹筆致縹緲平坡着古松一株虬龍夭矯蒼髯拂拂如聞濤聲瀉出翠微窅靄間旁點葉樹一小株隔坡又敘近坡境界空曠純仿營丘得其神趣

壬戌十月望前日崑山道舟中書思翁

董元宰楚山清霽圖

絹本高四尺闊一尺八寸寫秋山清霽景得平楚曠
遠之致尤妙合古人減筆法文敏凡三題按圖落墨
於午日而設色點綴在中元閱三月乃成少陵云十
日一水五日一石此圖有焉

萬厯己巳五月武陵官署寫楚山清霽圖董玄宰

是秋七月之十四日設色遂爲秋樹落葉以點綴秋意玄
宰

是日正午日也海虞瞿洞觀爲辰州郡守署中余出米元
章擬古詩米元暉畫瀟湘白雲卷視之咄咄賞歎予同年
辛司理亦在焉郡有德山霽後秀色可寫遂復圖此蓋余
筆半歲矣賴結習不忘如定中舞耶七日再題

董元宰荆扉圖

紙本高三尺餘闊一尺三寸行筆冲澹不事絢爛別具一種高致詩款題澹金箋書堂逸品也

雖有柴門常不關片雲高木共身閒猶言住久人知處見欲攜居更上山蔣道樞見訪留西樓十餘日爲索予山居圖以此贈之乙卯立秋後三日也董玄宰

積鐵千尋居紫虛雲端雞犬見村墟秋光何處堪消日流水聲中讀道書乙卯畫山居圖以唐詩題之癸亥重展題以拙句夏五望後三日其昌

我有荆扉懶上關常呼病鶴鬪清閒若容蔣翊來參我不是深山也是山蔣道樞訪玄宰後又入白石山訪眉道人依韻贈之陳繼儒題

董香光晴嵐蕭寺圖軸

絹本高二尺五寸闊一尺四寸小楷書款十四行大設色公謂千里睇遠從此發竅殊高自標致也

萋萋春草秋綠落落長松夏寒此王右丞田園樂詩也余丙午秋在武昌思歸甚因畫此圖苦於著色久置篋中今年歸自閩懸車埽徑頗有餘閒因檢舊圖點綴仿余家所藏北宋人晴嵐蕭寺意蓋伯駒伯驥亦從此發竅與右丞畫非一家法也庚戌七月三日董玄宰

董香光仿范華原山水軸

鏡面箋長三尺一寸闊八寸跋款俱小行書計八行
畫仿范華原全以墨骨取勝覺秀色可餐

宋人畫如李范董巨輩江南所少京師猶存什一蓋金元
有章宗文宗收入內府時有闌出余見董巨數圖至范華
原爲劉尚書大司空購得至佳一軸許贈余作平湖碑潤
筆後以河工不就見削畫亦竟不復至今日偶憶其筆法
寫此丙子重九前二日思翁識

董香光詞意圖軸

絹本高二尺六寸闊一尺有咫設重青綠筆法高古
氣韻厚潤松幹鱗皮斑駁墨皴如鐵楷書特妙

景物因人成勝概滿目更無塵可礙等閒簾幕小闌干衣
未解心先快明月清風如有待 誰信門前車馬隘別是
人間閒世界坐中無物不清涼山一帶水一派流水白雲
常自在

寫此圖成似沈會宗詞意以書之戊午七月立宰

董香光助喜圖

白麗箋本高三尺三寸闊一尺四寸峯巒林木皴斷
拗點全用焦墨氣韻仍復淋漓是神明於荆關法度
而自具骨力者文敏畫大都以秀媚取勝此殆筆頭

變化沾沾自喜故以助喜名圖也

復之甥見余所畫山水輒收貯篋中且欣然有意磅礴謂
舉子業外惟此好不能釋因爲寫此助喜庚申秋七月九
日立宰

董香光仿梅道人圖

楚紙本白而細高四尺闊一尺六寸仿梅道人墨氣
古厚中別有天真平澹之趣未易以畦徑求也

元時梅道人與盛子昭俱工畫望衡字求子昭繪者屢相
接梅花道人之居閒如也子弟以爲言梅道人曰待之二
十及二十年盛民之門亦閒而梅道人之名始振至今稱
四大家丙午夏午擬梅道人筆因書立宰

董香光山水立軸

白楚紙本長三尺闊一尺一寸跋款共七行畫法有生趣鎖闌墨卷寫畫易歸亦一佳話也

己丑南宮墨卷五策爲好事者所藏得岸上人袖以示余風簷倉卒書道殊劣何煩碧紗籠襲之三十五年也自予孫庭收之則不啻傳衣矣以此盡易之癸亥三月廿一日
玄宰

董香光江上蕭寺圖

生紙極白高三尺闊一尺二寸位置蹊徑全以神韻取勝畫作於辛酉越六年丙寅重題殊自珍秘也

蕭寺曾同一鶴棲夜深臺殿月高低何人爲倚西樓住共看千山雪漲谿江上蕭寺圖辛酉二月七日寫玄宰
丙寅十二月婁江阻風重題玄宰

董香光鵲華秋色圖

追摹松雪丘壑結構亦足步武獨怪少墨法筆法多作家習氣牧翁謂公畫最矜慎貴人巨公請乞多情人捉刀或點染已就童奴以贗筆相易亦欣然題署此殆是歟子閱公書畫多矣頗能別白是非品定年歲蓋公畫早年英銳中年蒼潤晚年純以骨力勝此圖無可倫擬但絹素精二款書法超邁可重耳

余家有趙榮祿鵲華秋色圖爲同年吳光祿易去追想筆意寫此董其昌 弁陽老人公謹父周之孫子猶懷土南來寄食弁山陽夢作齊東野人語濟南別駕平原君爲貌家山入囊楮鵲華秋色翠可餐畊稼陶漁在其下吳儂白頭不歸去不如掩卷聽春雨吳興鵲華秋色卷今在潑如年丈家遺此伯雨詩余重錄之董其昌壬子二月